

光緒撫寧縣志

撫甯縣志卷六

壇廟

寺觀菴  
堂附

壇之爲言坦也封土爲壇廟如見其貌焉駿杰在廟  
皇輿無外誰違雷雨風雲下邑雖微亦有山川社稷  
八蜡不遺夫表畷農祀其先三厲並告於城隍恩周  
於鬼爲文章司命文冢宮有六星代帝王伏魔關帝  
祀隆三代煌煌乎典禮攸關祭儀宜備矣他如鄉先  
生之祭社賢有司之遺碑亦若文翁化俗蜀地留祠  
柳子成神羅池立廟雖未列於祀典久已繫乎人心  
固非青牛白象徒聚緇黃紺宇琳宮妄施金碧者比

也然而虎溪笑過猶招蓮社高賢鶴鵲翩跹不少蕊

宮仙子自昔三元三乘總涉乎虛於今一壑一邱聊

資點綴故梁公雖禁夫淫祀而銜之偏記乎伽藍志

### 壇廟及叢林

社稷壇在縣西門外土城基東

案會典順治初定每年春秋仲月上戊日致祭雍正

二年奏準縣稱縣社之神縣稷之神

風雲雷雨壇在縣南門外半里路東

案會典順治初定共爲一壇每歲春秋仲

月致祭雍正二年奏準安設神位風雲雷雨稱風雲雷雨之神居中山川稱某府州縣山川之神居左城隍稱某府州縣城隍之神居右共用白色帛七禮儀與社稷壇同乾隆二十二年三月禮部覆準與社稷壇同日致祭

先農壇在縣東關外東嶽廟路南

案會典雍正四年令各省督撫轉行府州縣衛

擇東郊潔淨豐腴之地照九卿所耕藉田畝數爲田四畝九分立先農壇每歲仲春亥日督撫以下等官率屬員耆老農夫恭祭一切禮儀祭品與各省社稷壇同藉田之制距壇南二十步所在神路東爲區長二十步寬二丈凡耕耨耒官一員進犁官一員進鞭官一員左右侍播種官一員執青箱隨後播種農官一員牧夫一人執耒駕牛前導耆農六人助扶犁轉接進反進犁等官縣以教官雜職爲之凡耕具皆赤色牛皆黑色籽種祀土所宜

附旱雩祈社稷祭城門禮

凡各省府州縣衛而陽愆期行祈禱禮隨其宜無定儀雩祈雨社祈晴或就風雲雷雨壇或就社稷壇海神龍王東嶽城隍各廟致禱雨澍報謝雨霽報謝祭品禮儀

雩祈禱

崇城門禮前祭一日地方官出示禁屠宰各官於本署致齋如齋儀視水來最多之處或地勢窪下霍潦最盛之方或舊有河河水濶深之所於其城闔修除清潔設

神位於城闕正中內向設祝版於神位前神位以黃紙爲之上書某縣城門之神位報祭則焚之

厲壇在北門外迤西

案會典順治初定直省府州縣各立厲壇於城北郊每年清明日七月十

五日十月朔日祭本境無祀鬼神府

稱郡厲縣稱邑厲咸以有司致祭

武成王廟在明倫堂西康熙十六年知縣劉馨教諭聶應

聞捐貲創建乾隆三十六年知縣陳鍾琛道光十八年

知縣張煦重修

邑宰陳鍾琛重修撫邑武成王廟碑記云嘗考漢唐以前有文廟而無武廟自唐元宗開元十九年始立太公廟以燕昌國君漢張留侯唐英衛諸公備爲十哲春秋參祀如孔子禮迨後歷代增修比省會府州縣之地大率多立廟者撫邑武廟創建於康熙十六年邑令劉公學師聶公經營成立而縣治之體統始備歷年既久殿宇殘缺戟門櫺星門漸就頽廢余待罪於茲每切修舉之念歲辛卯吾宗五倫六吉昆仲偕王君化傳慨然登

願與邑之由武庠起家者踴躍捐貲鳩工庀材兩閭月而敵側者以整漫漶者以明廟貌維新誠足以妥神靈而昭典制矣工既竣問記於余余維古無歧武於文之事禮樂射御學者蓋未嘗偏廢也然自分途既久章縫之士日殫精於典章經籍而常若不足於是折衝禦侮不得不別置翹鬪負重之科以待夫魁梧奇傑之士而武成王之廟遂與先師文廟同爲朝廷崇德育才所並重諸君斯舉誠有當於國制之大也顧余思之王雖以武祀然觀之丹書自獻見知紹統其經天緯地者原不僅以起起之概昭示來茲則今日之沐王庠守王教者宜何如束身名教以恪遵夫敬勝義勝之旨善夫前記之言曰諸生孝弟禮讓人自重於以儲千城之望著元戎之勲乃爲建廟崇祀之意余迂鈍無能竊喜諸君之好義有爲藉得遂數年屢欲修舉之念故卽舉前人揭示之語以復於諸君庶幾聖人述而不作之訓至於興創之由規制之畧則前記具在茲不復道云

邑宰張煦重修武成王廟碑記云丁酉歲余倡率撫邑人捐貲修葺學宮既葺事尙餘金若干兩而先師廟

舊有武成王太公廟自乾隆間縣令陳公補修後迄今近七十年上雨旁風漸形傾敗爰以餘金整理之命匠庀材鼎新葺故不數月遂還舊觀工竣思以崇祀之意重新之由勒諸石以爲郡人士勸因言曰夫文止戈爲武古人稱武非尙武取戢武也殷之高宗有鬼方之伐三年克之名曰武丁此物此志也王當商周之際獨夫肆虐衆畔親離王乃整軍經武奉武王以東征伐罪弔民戎衣一著而天下大定於是放馬歸牛干戈載戢示天下不復用武古之神武不殺伊尹而外孰有如王者唐代武成之封良有以也顧武與文實相表裏邵子說禮敦詩而中軍可將祭遵投壺歌雅而征虜有功是知折衝禦侮之才未有不深於學術者也以王績著鷹揚陰符一冊後世言兵者宗之似優於武而緇於文者然其銘丹書也一則曰敬勝怠再則曰義勝欲實與唐虞傳心之旨互相發明此豈徒善戰陣逞武勇者乎孟子所以推爲見知而沐其教澤者所宜享祀勿替也不索乎此而謂

朝廷取士歧武與文今茲之廟專爲武設或致講武之家糾桓是尙禮讓不問而於鄉曲間多武斷其不見絕於王也僅矣夫惟修武備者弓矢之暇卽事詩書不徒成

強悍之俗習文事者禮樂之餘兼嫻射御不致有  
積弱之形庶有勇即可知方而干城腹心之寄即預養  
於優武修文之時其斯爲服王教而彰  
國典也歟道光十八年夏月

同帝廟在西門內路北後殿在正殿北一在臺頭營一在

任各莊東一在後七里澗一在樊葛莊一在潰地一在

官莊一在西河南一在東河南一在洋河套一在盛鐵

營一在邴各莊一在東城觀西一在吳官營西一在萬

家莊一在都寨北一在牛頭崖一在大李莊一在五王

莊一在上徐各莊一在蘆峰口東一在燕河莊東

案會典順

治元年定每年五月十三日祭九年

救封忠義神武關聖大帝嘉正三年

封開公三代公爵制造神牌供奉後殿五月致祭外定於

春秋二仲月上戊日祭五年題準前殿用太牢邊豆各



十後殿不用牛邊豆各八其五月十三日但祭前殿不用邊豆用果五旬

明副使劉效祖臺頭營新建關王廟碑記云臺頭營城北多岡壑每夏秋霍雨水輒漲而啗城居者不安堵多患之然無源之水涸可立待既不能引置爲渠而峻坂下注卽堤防亦莫可施叅戎張君來受鎮事父老有以其故告者君爲齟唇久之曰父老且休矣吾將爲若思焉乃於自公之暇殫心澄慮忽自臆曰明有人幽有神其相違者跡其相通者理也若茲水患當立神祠以鎮之已又謂漢壽亭侯正神也能爲人禦災捍患與其崇事之別所宜莫若就茲地而廟貌焉復召父老與訂之父老曰善遂審曲面勢爲之起正殿者三楹安室者三楹翼以廡室相向各二楹而桂枅墉垣靡不結構備具既告成乃命父老奉侯像自演武廳舊址遷於斯營士卒亦多負弩爲前驅者君爲告奠間以其辭語余曰惟侯之生乃在漢季忠勇天成以興蜀帝英靈不泯既沒爲神保我疆場庇我黎民繫此行潦歲時爲患砥柱其誰惟侯是振春秋享祀以莫不虔雲輿至止障我遐馭余聞而嗟異之竊謂君以安人事神神必爲君以安人出明威召捷於影響古所謂能禦大災捍大患則祀之

此君事侯之意也不則漠漠中既不與我事而千秋萬祀靡享血食者之謂何神必不然雖君亦不謂神其然矣君屬余爲記余遂檢押其始末以登諸麗牲之石惟侯有神垂靈鑒焉萬曆七年孟冬

文昌宮在文廟東道光十八年知縣張煦重修一在舊縣

南街一在臺頭營大南街咸豐六年升入中祀一切典禮與關帝同樂章六份牲用

太牢

邑人王印祥移建文昌祠記云撫甯舊無文昌祠先是嘉靖末余約諸友人各捐貲構祠於西北隅地屬乾亥非交星所宜邑侯靜宇雷公深念人文寥落率由風氣閉塞謂文昌祠幽僻於西北文廟洩露於東南不合堪輿法乃移祠於文廟之東厥位巽方厥面荆岡文星拱泮青龍奮揚於萬曆十六年春經始不數月告竣正殿三間東西廂房各三間二門三間大門一座週圍繚繞甃垣推塑像飾煥然一新視昔僻處西北隅蓋天壤也計其工費皆公捐俸贊成不擾民纖毫且治邑十年美意良法實諸帝君訓言誠無愧歎宜其喬梓聯芳福祉

未艾及我士人竝受其庇而文風自是不變矣夫以主  
司所較者士之文也帝君所鑒者士之行也鄉人士試  
一省之果於帝訓無愧乎誠飭躬勵行苦學潛修心事  
幽顯一一可對神明知而忠孝節義之士應科疊出人  
將曰雷公精於堪輿也如此士子應於風氣也如此雷  
公神於教化也如此士子果於修爲也如此美士風益  
美雷公不然文藝雖工而實行則缺即日事呻吟鉛槧  
神將奪其鑒而益之疚也無怪乎人文日否而雷公遷  
祠之意亦徒焉爾  
鄉人士其勉旃

魁星閣舊在西城上以堪輿說文星宜巽方明萬曆十六  
年知縣雷應時移建於文廟東康熙十年知縣譚琳捐  
俸更建於紫荊山南峯上一在臺頭營

邑宰譚琳紫荊山題詞記云撫邑舊有奎閣置西城之  
隅與城堡伍于人文絕不相屬也癸丑之夏予乃捐資  
卜建於紫荊山之中峯仍繪像祀之遠近觀者莫不欣  
然志喜蓋峯路巽位洋河之水周繞山足凡數折而後

出關恰與峯宜山靈實有待非偶然也客有過予者謂  
之曰魁星文神也宜與文廟依茲乃距邑數里許其于  
邑之文治何居予曰不然魁星也文明象也在天則文  
明在天在朝則文明在朝在一邑則文明在一邑在天  
下則文明在天下知登斯閣也西望帝京南抱大海東  
望遼嶺北極太行俯視四方縱目千里莫不擁至文以  
相向斯文之大觀在是甯徒沾沾焉存撫城一丸之見  
哉客曰敬聞命矣行將全撫人士共觀文明之盛事矣  
因記

明永平監軍兵備劉景耀臺頭營奎閣記云天下有揆  
文奮武之教非得人焉毅然倡始軍民亦習而忘之如  
臺頭營奎閣是已營距邊四十里一牆之外卽部落住  
牧爲從來用武地生長其間者罕事詩書人文無表見  
又值己巳庚午之變西隅連陷臺頭獨完保僉曰惟干  
戈是賴迎問文德哉協帥張公則不然公守臺頭逾三  
載甲戌夏奉大中丞楊公檄涓吉朔建奎閣軍民爭輸  
凡三閱月工竣交人雅歌武弁投壺相率歡忭於閣之  
下案奎爲天之武庫白虎七宿之一而演禽象木狼誰  
謂專司文教邊鎮可以不建也哉惜戎行無識此意者

特以待張公今日也閣距城東南隅週六面凡七丈五尺高三丈七尺張公名時傑例得并書崇禎七年九月城隍廟在城東南隅正殿三間東西司房各三間皂隸房各一間後殿三間一在臺頭營南街

明蕭瑞鳳撫甯縣重修城隍廟記云國家設城隍以衛民咸立城隍神祠春秋祭享其禮與風雲雷雨山川社稷之神並舉所以祈神祐而護國福民也考茲邑沿革舊有土城二在洋河東二里許名陽樂城洪武十一年建邑侯婁公大方居西土城因避兵於兔耳山陽奏請依山爲縣治創城隍廟永樂三年設撫甯衛指揮吳沂居東土城陳愷復建城隍廟於西門內成化三年左都御史李公秉右都御史岡公本以縣衛事宜協同檄縣移治衛城仍大其城池邑侯胡公方建城隍廟於新縣西預備舍側十九年邑侯姜公鎬鑄造鐘篆宏治七年邑侯李公海復遷廟於城之東南隅嗣後邑侯陳公王業公宗蔭段公廷晏姜公密李公一本皆相繼修葺閱二十年復就傾圯萬曆二年春張侯鳴工庀材正殿寢次弟修舉民不勞而財不費既成主簿程君卿典史

某君正道庠師孫君鑾請紀其事於石乃述其廟制之  
詳以俟考焉侯兗州甯陽人名彛訓以麟經魁鄉薦登  
辛未第來漉茲邑  
役所其別號云

邑宰錢鑒重修城隍廟記云郡邑必立城隍神祠以衛  
民以報功也爵視五等而職爲民禦災捍患若司牧然  
祀典咸秩而神獨與民近水旱災疫必禱焉江以南崇  
而奉者殫土木之奇極儀衛之盛氣象烜赫軼於羣祀  
歌舞報賽無虛日非徒侈外觀亦以妥神而酬福庇也  
撫邑城隍神祠攷邑志始於前朝洪武十一年而不常  
厥所孝宗七年遷於城之東南隅是爲今祠神宗二年  
一修之記稱有正殿有寢殿若侈於前而仍卑庠湫隘  
神宗距今一百七十餘載未聞賦工則傾圯頽敗固宜  
居民習而安之若不知神之庇民者歲時朔望未獲一  
饔否則岑寂可知甲子之歲余奉

命宰撫甯下車當四月八日農事方興久不雨撫地高無  
川澤之利播種灌漑資雨澤失時不雨且無以爲終歲  
計四郊之氓惴惴焉皇皇焉侶而噪羣而號倉皇奔走  
不知所出余心靡甯片雲而祀者莫不畢舉雨不應益  
惟是思神之闕民休戚者莫若城隍神與紳士劄伏烈

日中五步一跪由署至祠與神期日理明治幽分有異而保障之責則同縣令甫視事無獲戾於神今百姓焦渴縣令懼矣神獨無念乎神果應時而雨以蘇我民必重新神祠以答神庥紳士庶民實聞斯言禱畢而雲興未幾而雨降優渥沾足四野告徧維時五月下旬於農事稍後而大有秋余與紳士徐升庸等謀所以新神之祠者而士庶爭輸緡緡三日辦千七百餘金爰規基址量度程重門周垣殿寢深邃亭廡階除以次整齊視向之頽敗零落於荒烟蔓草者赫然成鉅觀矣又斥餘材新前令王公之祠於廟西畔屋宇映帶益增其勝斯亦可以迓神之止而神大庇我民者將無窮也徐君等謂余曰是役也昭神之祝告年之豐用民之和其公之誠感歟余以神之貺也年之豐也民之和也余何以致此惟紳民之趨事赴功不忘舊德爲足風世而垂遠也略記如此

火神廟在小西街路北萬厯十五年修一在臺頭營小南

街卽古武廟

案會典康熙二年定每年六月二十三日祭

馬神廟在典史署前及馬號內驛胡同一在臺頭營南今

廢一在盧峯口南街北胡同舊驛基

邑宰李德重修馬神碑記云馬政惟邊最重國家使市之法及民間芻飼孳產之事皆視內地特詳故馬之產惟邊最良撫邑古榆關地東北之要衝界居庸山海間烽火常接焉今則數萬里皆聲教所訖驛去京僅六百里與京之使冠蓋相望文書過境絡繹不絕故額設馬多於他邑民今日幸生

聖

人之世不見兵革幸車服賈各安其業故馬之孳畜恆盛

昔之稱庶富者魯歌駟馬衛咏駟其信然歟馬神廟在捕廳署前創於明崇禎十一年雍正十二年重修祀事維謹然而風雨不雨梁桷彫剝余蒞任始卽惻然有修葺志而未遑舉也越三年始謀於紳耆又值調任青邑周委少府翁君畢其事君捐廉以倡不數月閭閻樂輸若干金遂盡復舊規且增廂房四間俾司香火棲止南拓廟門丈餘而規模式廓工既竣告余爲序以勸諸石余謂神爲房星之精其在詩曰吉日維戊既伯既祈余不獲執爵將事少府其爲我祝曰維神永庇驛駒



歲無天殂尙其福哉  
毋乏國用毋失民望

明副使劉效祖墓頭營新建馬神廟記云墓頭營故有  
馬神祠與陣陸並經始不知自何年燬於回祿無能爲  
嗣起者萬厯丙子范陽張君爵來受事甫下車誰何及  
此恍然有慨於衷迺進部屬諸材官謂之曰國之大事  
在兵軍之司命惟馬然其漢中必有神以典護之奈何  
歲時闕俎豆也於是先蠲秩俸若干以作權輿次令諸  
材官量力爲俟助焉等祠之舊跡未由得迺卜城南演  
武廳西隅蓋廣袤若干爲正殿三楹門一楹退舍三楹  
置守者供掃除自是歲時舉祭典君必薰沐而後對越  
焉今既三年所矣而馬之調習蕃息恆必賴之君私竊  
幸甚顧未有言以記歲月間嘗爲余道之余謂君曰君  
茲舉可謂急先務哉古昔周官以馬政爲重牧師校人  
皆其官也天駟先牧馬社馬步皆其神也歲秋冬鴈享  
皆其事神之典也卽在內服偃革時猶然不可廢矧茲  
邊徼日需駟駿以捍敵可視爲細故而漫不加之意哉  
迺君能銳情興起爲馬以事神然非獨爲馬爲馬卽爲  
兵也爲馬與兵卽爲國家固疆塲也君誠可謂急先務  
矣然又聞君不獨事神其備舉馬政如易秣必登調習

必專馳驅必節皆躬自督視以是卓樞多上乘而馳蹟者無百一以此攻敵何敵不克以此衆戰孰能禦之語云君子先成民而後致力於神君其庶幾矣乎君名爵字國正蚤承世胃久歷戎行蓋師中之瓊望云萬曆己卯孟

冬

三皇廟俗稱藥王廟在北門外久廢同治初年僧中和募化重修一在臺頭營西甕城道光四年從西山麓移建一在馬鞍山

東嶽廟在東關西向成化三年創建宏治十二年正德三年隆慶五年皆重修頽廢已久康熙十七年知縣劉馨捐修增南北禪堂各三間廂房各二間一在臺頭營東關三月二十八日廟會前後十日商賈雲集一在縣東

上徐各莊

龍王廟在西門外路南明知縣徐汝孝建後廢僅存基址  
康熙七年五月知縣王文衡禱雨感應捐貲重建一在  
盧各莊一在臺頭營東關北一在深河東門外一在傅  
家莊一在成百莊東一在燕河莊

土地祠在縣署大門內東

八蜡廟在城外西北隅道光年重修

劉猛將軍廟在八蜡廟東每歲春秋丁祭次日祭

蟲王廟在縣北齊各莊舊名野蚡廟

真武廟在衛胡同西路北萬曆十五年建坊於南巷口曰

紫極宮今圯一在潘官西營古柏參天天啟二年建一  
在盧各莊河濱三月三日香火甚盛一在臺頭營北門  
上一在牛頭崖北一在駙馬寨有古槐一株明宣德年  
植後被火焚崇禎十三年復蘇順治元年益加芻茂似  
亦應運而興邑人王簡有詩刻石以志之

二郎廟在縣西冉莊東一在燕河莊西今廢

三官廟在縣治東南隅一在大丁家莊門西有蓮池數畝  
一在張各莊西一在官莊一在三里河有古柏二株數  
百年物也一在泊河寨殿前古松如龍攫擎虬盤可入  
圖畫雍正間道人手植一在臺頭營南關一在都寨南

街今廢一在太和寨西一在傅家莊一在東陳各莊

玉皇廟在城西南隅初嘉靖中原建紫荆山巔隆慶時移  
西關萬厯丁亥白世安捐貲移此有大啟三年鐘乾隆  
二十二年知縣宋英玉重修西夾室祀太歲一在兔耳  
山南頂殿壁西北隅常有氣出冬煖夏涼以泥塞之輒  
落一在七里澗西山半一在盧各莊街東一在臺頭營  
南城上有明巡關御史傅光宅龍松詩石刻

邑人王立柱禱雨靈應記云光緒丙子春夏亢旱四野  
皆赤吾邑侯張公深以爲憂問城之西南隅舊有玉皇  
廟每遇酷旱邑人所禱罔不驗聞五月朔率同僚屬暨  
蜀邑士民恭請神駕祀於郊壇命王致滋代撰表文致  
激命子植藜刺指血書表同衆虔誠步禱是日忽於龍  
駕前見一物長七八寸似蛇非蛇黑質紅章方頭細尾

光彩奪目敬請登盤供之案上日方哺邑人跪禱霎時  
不見偏覓無踪及眾僧誦經又露形香案之下至夜四  
更狂風驟至頃刻間不知所向詢諸父老皆未識其名  
扶乩問之是謂倮嶺考山海經獨山塗末之水東南流  
注於沔其中多倮嶺其狀如黃蛇魚翼出入有光見則  
其邑大旱初四日邑侯又命立柱撰表王植藜指血書  
表以乞靈佑連祈八日至十一日雲行雨施徧野霑足  
非邑侯精誠之感格於上蒼焉能有若斯之靈應也爰  
誌之以  
示不忘

雹神廟在縣西南四十里五月五日近村報賽香火最盛  
一在背陰鋪北山中五月五日村民競陳百戲士女聞  
集往來青松白石間頗饒韻致

財神廟在臺營東甕城一在太和寨東

增福廟在衛胡同西路北

府君廟在縣西五十二里趙家莊東

雙忠廟在西街南胡同祀唐英濟王張巡威顯王許遠畫像

精忠廟在西門內路北有鐵禱秦檜像

忠孝祠在名宦祠南東夾院祀明忠節三人孝子五人

國朝孝子三人

高德洪武十五年死事

周建成化十六年死事

陳舜嘉靖二十五年死事

楊珍有石坊在北街路西

金墉

楊有成有流芳百世石坊在東街

袁卉

孫國賢

趙名元以下朝人國

夏止名

孫昇

節烈祠三間在鄉賢祠南西夾院祀前明節烈十一人

國朝節烈七十二人

王公祠舊在西門內路北今隨城隍廟移城東南隅祀明知縣清源王臺肖像自題像贊尙存

明榜眼莊奇顯撫甯令清源王侯生祠記云撫甯王侯諱臺號古柏山東清源人萬曆四十二年除撫甯令薦卓異者數次越六年遷揚州府同知去撫之日士若民如赤子之失母也攀緣二百餘里至豐潤涕泣而回曰何日再見侯乎於是繪侯像建祠祀之不敏過撫甯見而敬服焉越四年撫之士民束帛陳寶求一言於余勒之石以垂侯政於不朽不敏肅容而問曰人情思於方去之時易思於去後之四年難樹碑于顯宦要津之人



易樹碑於遠郡佐閒散之職難今日之思真思也王侯  
何政而感人之深如此士民作而對曰侯撫民以仁訓  
士以禮賦役從輕刑罰從寬約束吏胥裁革冗役禁擄  
捕繩左道問疾弔喪表揚節孝賁湯糜以活饑民立保  
甲以資武備創書院建魁樓置社學以興文教朝勤夕  
惕百廢俱舉此侯撫綏之政也復修山石邊牆二千六  
百餘丈建臺三十座烽墩一十有四此又侯濟變佐時  
之政也不敏聞而歎曰侯撫民勤苦如此又能佐時濟  
變可謂盛世之循良而籌邊之利器矣世人以沉寵產  
蛙爲城守功不敏獨以爲綢繆未雨如王侯之功更大  
耳士民愛如父母戴如天地  
敬如神明有由然矣是爲記

許公祠在西河南關帝廟前院祀知縣魯山許夢蘭道光  
壬寅公辦理海防該堡挖濠種柳詳免差徭居民肖像  
祀之

王給諫祠在西街路北牌坊下祀明兵科給事中王印祥

木諫議故第族人奉遺像祀之

單氏宗祠在南街路西

天下宗祠多矣例詳諸牒礙難入志今單氏宗祠祭田千畝立法最

善故載入壇廟祠宇之末並附錄

記序各文以爲收族者取則焉

單氏宗祠祭田序云昔嘗讀錢公輔范文正公義田記

文正公置負郭常稔之田千畝以養羣族之人日有食

歲有衣嫁娶凶葬皆有贍擇族之長而賢者主其計而

時其出納焉已而考文正公貴顯時爲此於是作而嘆

曰人不貴顯探政柄無俟爲其難蓋云非敢緩也必有

待也今之人於其難者而克爲之於以奉先志而成孝

之大則觀卜黃單公建祠捐田記而有感矣其言曰始

祖自山東高密而遷前明永樂時家於撫邑之東河南

今子孫繁昌散處不一先君子與同族謀建宗祠置祭

田不幸辭世一切本祠房舍之猶隘也宗人共此祠祭

之田未廣也善後規條不請大吏恐後此繼嗣之日靡

也於是輯祠宇營市廛廣置祠田盈千畝之多又慮事

久易欺族大而吞併不免也遂繕冊呈明官立案據蓋

經營數十餘年之久而一旦迄於成此非敢緩也所以

謝奉先志而深思其善舉也然則今人生在

聖朝

沐浴膏澤如范文正公於貴顯時能有此舉也足為難

矣而知進退焉積日累勞久而觀成其終慰先人孝思

不匱如單先生之所為不更難耶先生少舉於鄉近奉

天子

恩詔獲舉優等選廣文矣久之不赴任則以有老母在

由今日觀之其為榮親也大乎太夫人鶴髮怡怡其樂

欣然也於焉逮及家人其諸葛藟之疊樛木振振之咏

螽斯殆為今誦者其立而待之

進士

出身特授中憲大夫提督湖南湖北學政刑科掌印

給事中加四級邑人溫如玉撰

又單氏家祠序云記有之親親故尊祖尊祖故敬宗敬

宗故收族注曰收族序以昭穆也師其意而行之則士

大夫家祠之建即收族之權輿也驪城卜黃單公余王

申同榜友也平生好施予不輕然諾以孝弟力田世其

家迨祖業中凋克自振拔耕讀為經勤儉緯之而家道

成祇承先人收族之遺訓兢兢焉日以知立家祠為念

又得師事其堂兄祿百公講明而切究之拳拳服膺有

志未逮者廿餘年至乾隆丁酉春始克繼先人之志而

家祠落成公慮祠宇之未能垂遠也祭祀之不能備物

也為之捐膏腴之田一千畝市廛之房四十間歲收租

息以承其丹腹供具牲牢公可謂善繼善述者也又體  
先人惇睦之心以其餘租用贍族人之不足于力者以  
釋其怨恫族人之中有空乏也老幼爲之養吉凶爲之  
周族人之窮于無告也孤寡爲之撫鰥獨爲之恤無力  
讀書者爲之立塾以教之有志制科者爲之資斧以成  
之至于地畝房間糧銀界址爲之詳司案以杜其爭爲  
之選廉幹以董其事爲之立章程以善其後既已周且  
詳矣至于支取存貯採穀備荒增地益租之細無不爲  
之條分縷晰酌定其規條以爲永遠計其承先裕後之  
功真堪不朽也由是一堂踞拜昭穆有倫則子孫之散  
處未識始祖之墓者入祠而僉乎有見愼乎有聞矣族  
人之遷徙未識同姓之親者入祠而尊卑有等長幼有  
序矣收族之道莫大乎是而親親以及尊祖敬宗胥寓  
於此是爲序乾隆四十三年戊戌仲春澤水李湜題  
撫甯單氏建祠捐田記惟我先考謀創建祠之二十三  
年槐始克承厥志而構材豎造以落其成古人云非敢  
緩也蓋有待也槐幼讀書從再從堂兄祿百學功課之  
餘間敘吾家世系淵源之自深痛心於始祖之字諱無  
傳而上世流傳以來稔知始祖山東高密人永樂時遷  
於撫之東河南家焉歿卽葬於其鄉之陽迄今子孫繁

昌上邇皆爲始祖之所衍育而散處不一世代愈遠子孫有累年積世未省始祖之墓者且有終身未一拜祭者其故皆因家貧力弱艱於跋涉而然也祿百兄心竊傷之嘗對先考言通四衢之地而建祠近居族人瞻拜必大有便恨力未能耳逮癸酉歲族有鬻產而居址邇者先考曰是可購建祠堂以遂祿百姪之志矣爰邀商從堂兄聿修熊飛再從堂姪紹康各聞善踴躍捐貲置訖方擬次第修舉不謂先考於丙子歲逝世矣聿修兄又逝於丁丑歲熊飛兄又逝於庚辰歲所遺一切善後概未措置僅一紹康經費不支槐孤隻一身孀孀在疚何以仰答先考哉自念建祠非艱保祠惟艱保祠非艱保祀祠之族惟艱既爲祖宗而建祠而同奉祀之子孫或饑苦無告無以爲生祖宗見之必有餘恫徒祠何爲念及此不得不展延歲月謀置祠田又念原置祠基狹隘用捐已業西街路南地基一處南北長二十五丈五尺東西闊六丈其南頭之東西長十六丈一尺南北闊九丈中建正廳三楹兩旁各附建一楹前建穿廳三楹兩旁各附建一楹祠後建圍房六楹後建書院內東偏建廂房六楹西偏建馬房六楹穿廳前左建書堂三楹前院外建大門三楹周以垣墉固以陶埴並捐護祠贍族祭

田十頃又附捐祠旁近市廛房三所四十四間總計各地房租歲可約得五百金因定支用規條十則並善後規條十二則從此祠可永保不墜族可庶免流離矣抑又有慮焉事久則侵欺易生族大則吞併不免謀於始弗慮於終後世其何據以爲法守用是列其坐落詳其畝至備繕清冊呈官立案使後世恪守遵行且以明遲至二十三年不能急成先考之志而待於今者其故蓋欲垂諸遠也族人聞而是之謀鑄諸石以示後余亦以肯堂肯構肯播肯穫者之尙有望於後人也遂允所請以爲之記乾隆四十二年丁酉吏部候選知縣壬申科舉人單氏裔  
孫槐敬撰

附

觀音寺在南門內迤西後有慈蓮樓今半圯有萬厯康熙年碑天啟三年鐘朔望習儀於此一在縣南馬家峪一在縣東南抓角嶼頂一在東桃園旁祀二郎一在臺頭

營北關有明副總兵張守愚碑一在太和寨一在榆關  
西河濱一在榆關東路北此寺舊在馬棚山陽明季傾  
圯村人趙福與室人丁氏發願捐菜園一區於順治乙  
未十月改建並置香火五十畝邑人王簡撰碑記其事  
一在五王莊一在宋家翟坨程萬倉本城人光緒三年  
獨力將藏經樓修葺一新  
子孫菴在衛胡同後城下爲陳氏香火

泰山行宮在西門外路北卽碧霞元君祠一在洋河古渡  
南岸一在東河南大莊一在盧各莊一在臺頭營一在  
都寨西北一在荷葉山院宇清幽可以避暑一在雙望  
堡東關一在泊河寨

盧龍辛大成碧霞宮重修碑記云淫祠之設功令有禁昔湯文正公撫江右毀淫祠凡數百厥功甚偉延今百十年來漸復舊習而象教興修名藍林立尤屬不典雖然方今太平日人物早民豐

聖天子崇重西番紅衣僧禮數有加焉夫

神聖豈真視如生佛而資爲祈禱哉然且立之大利納其徒衆叨覲有期錫賚如制豈不以夷俗信佛服教畏神如天如地因其信而禮之而西僧怙然矣而夷人之信西僧者愈怙然矣不褻朝廷之體已得懷遠之道古帝王神道設教之義如是也夫然而象教之設亦何不可臺頭營直北八里許瀕河有邨曰泊河寨舊有碧霞元君祠而左右翼佛象列焉歲戊午行脚僧亮文掛丹於此訝爲不倫度祠後隙地欲別建三楹位置諸天詔於衆咸曰可乃高閣數年所萬富李公慨其無成也因起而任之而鳩工庀材黜堅而鑿凡七閱月工始竣費錢若干緡雖大衆樂施而李公之力居多焉既落成積書劉子屬余爲記余素不喜然喜李公勇於爲善並喜村人之賽豐年於茲藏於茲種種吉祥善事不猶愈於作姦犯科乎其於神道設教之義微有合也爰誌其巔末俾諸石以證後之人乾隆五十七年十月



大安寺在西關路北今廢有正德萬厯年碑成化丙申鐘  
地藏菴在西門內衛衛女道士陳氏募建今圯一在臺  
頭營西下壕

三聖祠在北門外路東有萬厯四十三年鐘

白衣菴在東關路北萬厯三十五年指揮張耀先創修孝  
子袁卉植柏八株一在西莊前臨溪橋一在臺頭營東  
關萬厯年建有征西將軍大同總兵張守愚碑

邑人郭城白衣菴施香火地碑云蓋聞大千世界無非  
因果相投億萬人天總以慈悲爲主龍宮象塔不自天  
成白馬青鴛皆緣人力是以山陰推宅鑄淨果於許詢  
宜壽聞鐘著嘉名於荀勗凡諸成德概勒豐碑撫甯白  
衣菴者南挹荆岑東瞻嶽廟辟支留跡香紫蓮座之奉  
舍利騰輝甘露楊枝之露神道設教醒厯劫之沈迷何

法無量採諸生之熱惱率賴皈依之力大開懺悔之方  
獨是一指空禪外無寸土三車內典中乏新畬雖屢承  
衆善之捐施卒莫繼諸佛之香火乃有萬紳先生鄉賢  
長者割膏腴之地輸上錯之田給朔望之粢盛花綴菴  
羅之樹備春秋之禋祀鳥鳴必鉢之林是雖金仙之不  
沒其靈亦彌陀之好行其德僧寶林恐日定年淫芳微  
或息時移事易盛舉不傳爰是伐石  
緬林鏤茲紫篆岫嶠永峙功德常昭

觀音堂在南關外望荆莊路西向北有萬歷四十三年鐘

棲霞寺在縣西南十二里山林幽邃澗水潺湲門外石橋

傳爲唐鄂公建崇禎元年巡檢郭守存重修橋西片石

上有金馬遺蹤華亭沈荃題勺泉二字知縣趙端詩牌

尙存

趙端重建棲霞寺石梁記云縣城西十五里有兔耳山  
爲邑屏障山南麓有寺曰棲霞背山面溪溪旁石上馬

形金色昔人題金馬遺蹤乃邑之勝景也山南卽舊縣  
治村民錯落以居跨溪有橋建自唐郭國公尉遲敬德  
鄉之人凡陟山樵蘇者賴之以登往田耕耨者藉之以  
濟橋之利衆實與輿梁徒杠等至其爲坤水之要梁兌  
山之關端又與邑爲輕重固不獨金湯梵宇而已也余  
於勸農之餘憩於寺內登山瞻眺俯仰之間飛泉百折  
峭峯雙峙林木陰翳禽聲上下爲低徊流連者久之甲  
子夏五洋河泛溢平地水深數尺沿河居民悉遭水患  
余奉檄勘災重過山寺見夫洪濤湧橋被衝塌隔岸  
山光恍招故人其如急流正瀉一望彌漫無處問津迷  
桃源蹤跡矣嗟嗟自唐迄今歷經千載余以數年間滄  
桑興廢一至於此忍使山靈落寞水咽鐘沈也耶於時  
值修城孔亟未遑兼爲築橋之舉悵然而返作兔耳山  
行以志慨亦大不得已於懷者矣秋杪城工告竣遂於  
冬十月捐貲購料重爲建橋令本鄉之耆老董其事於  
乙丑春而落成焉余復與二三知契渡橋至寺暇而顧  
之見蹲踞低伏雁齒遙鋪石虹高聳雲刹近連轍喧曉  
昔之登臨別覺一番新色而碧澗清流更無復山行之  
感矣然是役也謂余爲利農樵之濟涉可謂余爲恣土  
庶之流覽不可謂余爲表一邑之勝概可謂余爲作精

藍之善緣不可山與城俱寺並山

永而橋又同寺與山共傳不朽也

副總戎趙朗夏日遊棲霞寺詩云兔耳雙峯秀遙青插  
海天林深方結夏寺古得安禪廣市樓中氣鬱沙檻外

煙腥風潭水拂  
應有渴龍旋

趙端壬戌三月下泮邀同沈宮詹夏徵君遊棲霞寺詩

云花明春寺僻水淨石橋幽兔耳宜邀月禽聲直似秋

圓時開士定一曲夕陽留酒興兼詩思殊堪紀卧遊片

石老寒煙霜蹄神駿傳碧抽春草恨紅對落花憐松響

清生樹雲低鶴下天邱亭今有地吾意欲逃禪亂山巖

時處絕頂覺天高歲月驚芳草生涯問濁醪醉書應自

聖詩史定誰豪石壁侵莓蘚臨風落兔毫薄日林臯迥

殘霞出岫明遠鐘虛谷應古木暮烟平蹊溼晴疑雨苔

青斷復生臣心同  
勺水聊足慰懷清

又春日同汪子明候姪景從兒景徠景衡遊棲霞寺詩

云禪房高聳亂峯頭此地烟霞足卧遊心遠獨疑仙路

近林深翻覺洞天幽敢將嘯咏同山簡自愛情

狂過子猷最是登臨多勝事竹牀茶竈共淹留

教諭辛進修九口趙邑侯招飲棲霞寺詩云何幸逢仙  
令郊原載酒過黃花迷野逕紅葉點山阿澗瀉泉聲連  
橋橫雲影多忘形已落帽醉倒更婆娑

錢唐趙景徠隨家大人遊棲霞寺詩云梵宮花柳散晴  
烟十里香塵駐錦鵲觴咏擬追春夜宴風流不羨永和  
年兎峯無恙摩霄漢馬跡何時枕瀑泉

歌管半殘人欲醉上方清磬自泠然

無錫王模秋日遊棲霞寺詩云策馬驪城古塞西萬重  
飛翠擁招提野花過雨香還淺山樹迎秋果正齊踏遍  
亂雲盤曲磴坐臨欹石弄清溪徘徊

側更欲窮幽奧免耳峯高落照低

華亭沈荃趙令君又呂邀同夏子宛來遊棲霞寺詩云

一礪龍潭勝雙峯免耳懸穿雲尋野寺撥草聽新泉石  
跡遺金馬松風韻管絃興來頻顧曲日暮未知還陟磴  
循松徑攜樽坐石磯野花晴落帽山翠冷沾衣地僻留  
僧話亭虛待鶴歸我來方數掌到此已忘機幽刹何年  
構棲霞此擅名曉窗延海色夜壑飽松聲園果秋堪摘  
山田歲可耕石橋流水靜湜湜照人情登頓何辭遠山  
川信有緣幽期真不負東道况多賢碧草餘春色黃鸝

動林天酒酣隨石

去回首渺蒼烟

蘇濟秋日遊棲霞寺詩云十里晴光散曉霞尋幽重過

老僧家雲開山徑初傳唄木脫寒林尙見花結社未攜

彭澤酒汲泉堪煮趙州茶歸來

策馬斜陽路遙臨邊城起暮笳

程士奇遊棲霞寺詩云寶地何年建相傳自鄂公門前

春柳綠山外海雲紅拂石尋金馬疏泉度彩虹雙峯天

際起兔耳

插遥空

趙道敷秋日遊棲霞寺詩云巖城霜落正深秋重向琳

宮續勝遊萬壑碧雲侵蠟屐千林黃葉點征裘捫來絕

壁山光冷望入平蕪海氣浮爲愛

清幽吟眺久隔溪樵唱起邊愁

邑人王運恆和沈大宗伯遊棲霞寺詩云爲踐登臨約

相將老褐衣水流川上趣花發箇中機短髮羞春草雄

心付釣磯諸峯留我醉頻促未能歸棲霞遺跡久幽僻

未知名刹有鶴鸞侶橋無車馬聲風吟林樹靜月印勺

泉清願結山農

耦優游此處耕

樂亭歲貢倪汝初到棲霞寺詩云林泉僻且幽絕無人烟住松聲萬壑鳴是我棲霞處

又勺泉詩云東海有巨碑題云一勺多此水真一勺能添東海波

圓通寺在縣西二十里黑山峪嘉靖戊子建康熙辛巳重修有判官脫影石衣冠鬚眉如畫

重興寺在舊縣西崇禎十五年知縣李果珍重修

蟠桃宮在聯厓山舊爲道觀今僧棲焉

石佛寺在縣南十五里山林聳秀泉石淵深

華嚴寺在縣南二十里輞子峪

龍泉寺在縣南二十里無瑕峪寺後有天井峪遼天慶間建菴明宏治十四年辛酉茶盆山沙門智惠卓錫於此

募村人重修造石佛一龕五十六尊今地基僅存內有三截四面碑高丈餘上刻佛像中刻蓮座下刻華嚴經茶盆山菴僧奇宗撰誌一在界嶺口西溝一在樊葛莊西北橫山之陽元時古刹也地甚幽僻花香鳥語聞者清心

盧龍辛大成夏日書龍泉寺詩云杳靄巖扉薄暮天長  
席人靜翳晴烟微涼不用蒲葵扇一枕斜陽雨後蟬  
訓導魯松僧演印擊蛇傳云無瑕峪佛寺迤西南深山  
大壑林木叢密如櫛蛇虺生焉寺僧演印大名人拳勇  
素雄南北寺故有羊羣寢訛降飲日夕下來無執鞭而  
牧者月計輒少數躡初以歧路之亡也繼疑有攘之者  
迹之入幽谷白骨狼藉羣鵲啁啾繞而飛腥風撲鼻方  
遲疑錯愕瞥見巨蛇如桶冠如骨咄岸紅質黑章蜿蜒  
巖穴間見僧昂首吐舌怒逐欲吞之僧反奔而逸聞耳  
後風聲謖謖草木披靡疾趨返顧不及者十數武前阻



深澗無旁徑澗二丈餘僧一躍而過隔澗視蛇縮曲如懸弓縱體騰越掉尾鞭僧光閃爍如飛電山有石柱僧掩柱後蛇尾適中柱響若山崩柱中斷尾末稍僧衣裂幅脫落蛇力猛剝鉅威少殺負痛絞絞而戰振蹕揚厲吻翕張毒涎噴溢有聲僧急欲關手無寸鐵旁有樹拱把屈其身斷之以蹀倒持擊蛇蛇首尾宛轉拂觸僧乘隙力批其首關移時要害屢中蛇漸委頓僧賈勇碎其首身猶躍躍掀動不止僧少息回寺喚傭徒曳歸僵臥如梁觀者猶不敢近乃知葬蛇腹者不僅嘽昔之羊也剝皮寸磔之蛇猶有靈夜輒惱僧眠若恨不瘞其全軀欲鍊氣復形而不得者僧不勝其擾刻木蛇炷以焚香後亦無他異至今談技勇者斷以僧之權奇迥非人力所能及噫抑異矣此道光二年三月事木蛇猶存寺中

復興寺在鵬嶺俗呼下菴子

平房寺在龍泉寺西三里

大興寺在洋河莊傳爲唐剎有萬厯順治年碑

觀音菴一在縣城郭家衙衙一在西門內南牆下一在洋河馬莊一在洋河王莊一在潘官西營一在郭家營一在留守營一在臺頭營小南關一在都寨南街一在馬棚山旁爲馬頭鋪一在韓家林一在官莊

清源寺在張各莊北有泉十餘泓匯於左寺由是得名有順治八年碑一在大李家莊

朝陽菴在樊各莊西山上松濤泉瀨清人心目盛夏多遊憩於此西夾院有文昌祠奎星閣靈秀特鍾向爲會文之所

水月寺在水沿莊同治十三年僧法體募化重修

崇福寺在縣南三十里石家莊道光年重修

龍崖寺在縣東南十八里胡各莊東洋河岸有慘金佛三尊相傳爲尙藩人由粵東所鑄今地府志作龍岩

虎踞寺在塔子山明天啟年建康熙四十四年移那各莊西旋爲河鬻道光二十年生員李少白施地改建

福勝寺在縣北十二里西有小石柱呼之輒應一在縣東六十里

報恩寺在田各莊北山上

勝水寺在縣北三十里山舍有二泉冬夏不涸不溢屢汲不竭登峯遠眺則海天一色下有石碁盤相傳仙人對

奕於此久廢僧超恩募化重修

邑宰趙端勝水寺看紅葉詩云秋色明郊甸招遊古寺  
隈禪關寒日滿林葉賸霜催作賴參仙梵如花照客杯  
御溝非聖水傳語莫飛來

盧龍辛大成勝水寺遠眺詩云莽莽秋空迥憑高酒乍  
醒峯羅千點翠海劃一痕青塞雁低平楚晴烟接杳冥  
此心天地外何事苦勞形

臺頭寺在縣北三十里

彌陀菴在臺頭營東關

望海菴在臺頭營西關城根萬厯二十六年創建工部虞  
衡司郎中張宗孔撰碑康熙時趙自有重修乾隆四年  
樂令德等重修歲貢郭朝儒撰碑

秋月寺在縣北天馬山西嶺上距文几山里許明嘉靖中  
建庠生楊修道重建山舊無泉楊爾祚創僧舍鑿井得  
泉有三魚純白躍出因立石以紀之山門得月最早晚  
鐘時對之真萬里清光也

邑宰張上僉遊秋月寺詩云平岡復下坂柳色亂春渚  
蓬蓬遠翠間殿角露孤嶼古木峭以森枯泉沙作礎近  
山寺轉無乃在巖腰處舍車遂徒步餘勇猶可賈山僧  
頗野樸齋廚藉蔬圃知是長官來呼僮掃庭宇平臺堪  
小憩煮茗滌甌甌羣山正糾紛不辨孰賓主樵徑細如  
髮石痕半劈斧丁香發初胎松杉雜參伍俯視下山路  
炊煙滿村隅

香山寺在縣西北三十里香山

雲城寺在縣西北三十里燕山溝內有下方在溝外

垛石寺在東北三十五里前有三大石垛起院內有石井

### 五水與地平

教諭武克相重修三峯山垛石寺碑記云或言天下佳山水大半屬之僧房道院理或然也余則謂有僧房道院而山水之佳迺出臂之奇花異卉棲於幽谷之中非有特識者品題之亦孰知其沁心動目耶天地之大造化之巧磅礴濛濛洞凝聚交會何可勝窮然而登臨弗至憑眺無人則亦等諸荒坵斷塹寂寞無聞已耳且山居壑處齊民維艱惟緇羽者流其事可以感人心其力足以聚財利而其人又多遐議遠見足以經營而結構故凡一丘一壑得爲僧房道院者莫不改觀矧佳麗者乎撫邑之北去臺頭十二里有峪曰垛石岡嶺四合獨闕其西南山環抱如門清流湍繞禽魚悠然其中漸次廓大青松怪石各如人意行二里許其南有巨石者三危然相壘如人手置此垛石峪所以得名也又東行里許爲峪之盡處而山起焉是山祖黃崖頂天馬山爲其外屏有石峯者三中者如人拱立稍內斂左右有獅象形稍外出而向中峯此又三峯山之所以得名也山之東

麓有池泓然濶不過丈深不過數丈不盈不竭俗名龍潭神其說也而實峪門流水之源也自故明來卽有因而建寺者曰垛石寺規模狹隘山水之氣象弗昭久益荒廢莫識其奇僧者光慶老僧萬河之弟子也萬河大有解脫年七十餘飲食動履如丁壯貌有童子色光慶得其作用自康熙癸酉歲飛錫至止慨然重修計大殿三楹伽藍殿二座皆因舊而擴充之者也禪室五間東西廂房各三間東西地樓各三間西客座二間東廚房山門角門二門碾磨柴房無不備焉皆其所創建者也又擴地基三丈月臺爲塔九級殿塔三級圍牆四十六丈高丈餘下石上磚前後殿佛像修飾金鐵鑄造地藏十王銅像十三尊引泉水周匝於屋宇園林以爲烹湘灌既之便又爲東西二池以爲種蓮之所是役也工務求堅事務求永或再易或三易自癸酉至己丑凡十七越歲而工始告成佐之者惟已故趙君自榮呼君明堯及二三村中之善男信女也無沿門之鉢無勉強之請居然而成燦然而新凡登臨憑眺者仰而視其崔巍非有所築培而面日至是而呈其真也俯而視其崔巍非有所滌濯而意致至是而表其秀也一林一壑一禽一魚增色生妍刮垢磨光儼如天地之間今日而方有此

叢林今日而方有此山水孰謂僧房道院不足以增山水之色歟說者謂五蘊皆空四大非有卽有叢林山水亦殊多此一事不知空非真空乃可言空有所當有不可爲有此峪之上應有此山此山之中應有此寺正所謂空而不空有而非有者也後有作者知此意而增美之甯知不更有進哉是爲記康熙四十八年邑人宋赫堞石寺詩云雙石累青嶂相依秋已殘棲茲巖谷裏誰作丈人看月照長城曉霜沾絕塞寒泰山粉欲倚特立爾巒岈爲憐幽谷僻到此一摩娑疑是生公聚曾無米老過嶽寄違世久安穩得天多任彼封三品悠然臥

薜蘿

水峪寺在縣西北四十里猩猩峪北八里東倚高山峭壁百仞西臨深澗百餘丈佛殿三楹後爲僧寮西屋二楹爲誦經所殿前西廂房六楹遊人憩焉開窗排闥山如屏列後有飛瀑山寺東奔流入澗奇譎可喜每當明月



東升光圓到頂萬籟俱息令人超超有出塵想

邑人吳兆鼂水峪寺詩云雨晴風冷翠斑斑乞得閒身  
圖畫間採藥僧歸紅葉路釣魚人立碧溪灣香臺已許  
淵明共方丈甯無謝客攀我亦  
慣遊狂學士夕陽且莫閉禪關

彌勒寺在縣北六十里

聖水寺在乾澗堡北青華山上久廢道人劉雲鶴築室修  
鍊於此

西佛菴在東勝寨西崦內多於此讀書有崇禎八年鐘

白雲寺在落林峪西

玉泉寺在李良峪西

天慶寺在張家黑石北溝

盧龍辛大成天慶寺重修碑記云蓋聞利利瞿曇種分  
六姓能仁善慧派衍一宗留象教於波羅常昭佛日暢  
元風於震旦普蔭慈雲試看歡喜園中轉法輪而開覺  
路曾聞煩惱城裏現慧炬而渡迷津迴苦海之茫茫永  
名功德斷塵情之種種久最慈悲故寶氣初占花雨彌  
乎西極而金身不壞供養荷乎大千維茲山之鍾靈洵  
禮佛之淨土河流黑石儼同七寶之池峰湧黃崖可面  
十年之壁惜乎開創久遠漸覺道場陵夷僧人善俗早  
悟三空夙除八垢得聞第一義諦皈依不二法門果證  
無量識大梅之將熟清修最上知行者之通靈戒定慧  
懋劫相生早已放下布袋貪頑癡一絲不挂何須將過  
蒲牢乃於乾隆二十六年歲在辛巳卓錫於萬嶂之巔  
挂衲於五株之樹愛其幽僻恐遂頽殘增爲大觀居然  
化城之金碧撫其舊制愈覺法相之莊嚴夫而後鉢洗  
清泉性與晨鐘共適經繙貝葉心隨暮鼓同參麋鹿啣  
花而馴擾編鶴巢松而徘徊徧地檀香無非般若虛心  
禪理總是法身誠哉入道之叢林展也  
眞如之盛境是爲序乾隆三十三年

望海紅沙寺在縣東北七十里黃崖頂上因可以望海故

名金大定時比丘張三峯初建明天順間僧張淨朗重修正德四年僧李道敏募吏部聽選官楊福貴重修江右謝恩誥撰碑寺有鐵瓦無梁殿瓦鐫明定國公徐彥昭與府中男女施鑄姓名每歲十月初五日香火最盛崇禎十六年僧雲祥募邑庠生馮景運重修有永平監軍兵備石聲和撰碑下方曰黃崖寺康熙四十五年僧莊福募臺頭營外翰王養鳳庠生茹瑜董啟瑞歲貢茹珩許青雲重修知縣譚琳劉馨勸附近居民砌地址臺堦數百丈免其徭役改名金峯寺莊福示寂徒海印畢其事邑人王簡撰碑

明兵備副使石聲和增修黃崖頂碑記云寺創於金大定間僧三峯者應元代至我皇明今已四百餘載矣殘碑斷字慘淡夕陽間有僧雲祥往依焉斬草而居矢募修建跪誦華嚴夫古今之事靡不以一人亡一人興而一時有國聖湛源者往來燕永間結檀越作目緣而山之費稍舒矣有知彌者通音義善楷書多技能而寺之書記任之有顯光者總出入之數而寺之度支人之施予皆屬之而靡不給焉薪者汲者各執厥事固犁然而有序矣於是鳩工庀材未有者創之已有者新之穿天井造浮屠起韋馱殿築周圍牆垣白蓮獅象丹漆如繪因者什之一創者什之九又慮下院至禪室梯木易腐修石磴二十三級廊廡廚舍齋房莫不備焉登斯岩也夜靜風輕星橫斗轉晨鐘暮鼓貝葉繡經奇花怪石間古今之遙興廢之感恆必由之余親和元寺之檀越也夙緣山水談及此寺興廢之緣命余記之曰是役也不有三峯之創則雲祥何以因不有雲祥之修則後之人何以觀感興起於無窮耶今日之雲祥即昔日之三峯也余因述此意以爲記和元姓馮名景運邑之文學也崇禎十六年

邑人王簡黃崖頂寺碑記云黃崖頂之名著北平猶盤山之名著漁陽也峯巒秀折林木陰翳望之若相似然顧盤山以曲折見奇黃崖以巉巖爭勝正有不相似者則以盤山之勝半人力黃崖之勝由天成微有分耳崖背有龍眼泉二崖側盤松數十株崖前險徑丈餘行人不敢俯視再北則層峯插天入雲霧摘星斗矣雷雨盈足下日月到曉前途辨東南登萊數州隔蜃樓隱現中至若崖間四時春花錦簇夏木碧陰秋葉紅酣冬雪練積真天成非人力也余向異茲崖之境隨喜讚佛之緣掇敘以當紀述不負濟勝有具云爾

又創建金峯寺大悲殿碑記云俗傳西有五臺東有五頂皆摩詰勝跡稽山右五臺秀萃一山巖東五頂峙形各處要不出孤竹郡界而黃崖乃五頂之一開山於三峯和尚懸巖削壁滄海波濤雲霞沃蕩日月薄迴俯視臨榆碣石猶一卷耳四方登眺者記至頂十五里許勢不能躡履直前必齋宿而後扳緣非有下院以夕息人將望而畏之舊有數椽即名黃崖腐瓦頽垣逼處山麓實不足以容車馬遠近來遊者每借寓山村僦屋而居買飯而食事之非倫人多厭射有僧莊福目擊心動不覺慨然曰登大名山下無接引其不損鸞嶺之奇觀而

消鷹堂之真境者幾希遂卓錫於此勞心苦志養氣存  
神每眷言靈宇敦懷興葺祝遇同心共成因果恆言人  
有善念天必從之隨獲左右善信暨臺營施主外喻王  
養鳳庠生茹瑜董啟瑞歲薦茹珩許青雲者互相勸勉  
感動十方老僧引願勃勃不憚勞瘁鳩工庀材因高就  
遠創建巽廬大閣五楹莊嚴千手千眼佛像規模初備  
樂善無窮幸逢邑侯譚公選集高軒繼而敬菴劉公親  
臨山峪督催附近居民免其徭役人以悅來工以心兢  
共砌地址臺塔數百餘丈因而圍牆廡廡香積禪房次  
第俱興幾無遺議改寺名曰金峯丹刻羣飛輪奐離立  
儼然東土一大道場也纂葺方殷忽焉云沒所謂高軌  
難追藏舟易遠良可歎息其徒海印克承師志功著垂  
成補所未建重修大雄寶殿並石級山門迄今晨鐘暮  
鼓松柏青葱層軒曲檻迥出雲霓恍如入大千而荒三  
界者乎毓金碧交輝之景於深山窮谷之中不獨遊覽  
者得所依歸而名區勝地藉有榮光較之背牛仙人諸  
頂更覺奇絕經云祥河潑水寶樹低枝通莊九折安步  
三危豈多讓哉謀勒一石以誌之凡山之興廢寺之創  
修人之因緣僧之德行皆知所稽考而並以勵于  
百世後之發善心者康熙四十五年丙子季春

天祥寺在黃崖寺西

白塔菴在天祥寺西

青峯寺在良仁莊

望海寺在縣東南三十里都寨東北有康熙年斷碑

臥佛寺在牛頭崖南

永芳寺在縣東南三十里

古城寺在蒲藍北地基周如圓臺傳爲唐時舊壘築土痕

迹尙存土內往往有斷戟鏽刀

慈氏寺在縣東北二十里見駕坡創於元內有古柏二株

大數十圍上冲霄漢蒼翠可愛

沙河寺在縣東二十五里

清峯寺在縣東北三十里鴨兒峪山麓殿宇幽潔可容棲  
隱

碧雲宮在大李莊街心路南

福惠菴在大李莊西路北

清涼寺在縣東十二里

隆興寺在縣東四十里小科坨北山上

元方寺在縣東三十里沙龍店

清河塔廟在東茶盆山麓殿宇垣牆皆條石堆灌上無梁  
木用磚瓦懸造創於元三治元年



山神廟在天門山麓雍正六年修前有古松二株大數圍  
生於片石之上蒼翠挺秀

宏量寺在背牛頂下方朝頂者必由此初步久圯同治二  
年千山僧照心偕徒思忠檀慶誠慈募修迤北里許其  
間奇花異草目不暇給七八里外有小嶺鑿磴道仰望  
山頭如椅四圍陡拔西南置二梯猿引而上稍平復爲  
磴道又一梯相接過此仍循磴道更上二梯達上方矣  
計程可十里梯邊垂鐵索以防墜落一八十四環環長  
五寸一百八十環環長七寸同治四年海陽袁國任施  
鑄頂上有石碑二十九通東轉七井錯列其一特深丈

許皆石甃迤東爲大殿左右爲蓮池放生池就石鑿成  
殿南石城屹立四面有堞傳爲韋馱殿或云望海樓東  
爲無梁殿內供銅佛殿前爲關帝廟有呂祖背劍像東  
北石坡下有石缸大旱水不涸西北折南向有洞大如  
屋西壁鐫海濶天高四字參將林桐書東壁鐫諸菩薩  
最南則達摩像也繞頂長松蒼翠高鋸崖石根不著土  
稱靈異焉

印子寺在縣東北二十里寺東有石如印方五尺餘寺因  
以名

椒園寺在縣西十里明洪武元年建其地產椒因名嘉靖

乙酉重修有灤州高第撰碑

邑人王致敬爲王砥山招游椒園寺詩云撥雲尋古寺  
萬壑樹聲多路曲頻移屨情豪欲放歌新齋盈卷軸滿  
壁鎖煙蘿嵐影當窗落斜陽上竹坡自註云有  
亭在禪堂東畔乃砥山所建以爲讀書之所

于家菴在下京子北一里許

延壽寺在下京子東

水雲寺在縣西二十里

盧龍蔡珽水雲寺碑記云水雲寺古刹也不知建自何  
代余昔與器公家兄等游其處見壑中巨石上刻有元  
至正年及大衆五百會等字傾圯已久株磔無存惟山  
雲澗水自朝暮而已寺西谷口外爲所各莊莊有居士  
王靈陽先生不犯欲塵抱道自處凡數十年僧言山大  
師杖錫東來獲晤王先生夙生緣契法愛殷勤不忍去  
先生問師所欲居師曰無人居者我則居之先生欣然  
曰水雲寺久無人居矣當爲師經營之爰結茅而處焉

道存緣集衆歛事興凡三十餘年三遷而建寺於麓蓋  
王先生經始衆善信共力以助其成而有山之勞瘁胼  
胝亦三十餘年未少休也寺成索記於余余愧不文略  
述數語以誌其廢興之因緣遇合焉至於水之一味流  
通雲之去來無自萃無量莊嚴成衆生功德卽緣非緣  
無與無廢者此大師常住之水雲寺而諸佛菩薩七趣  
三有亦同居共處時時念念覲面相呈者也非一非異  
文長不贅也有山大師傳臨濟正宗三十五代名實菴  
一字湛水別號雲堂余嘗戲謂大  
師之字號既儼然受記茲寺云  
又題水雲寺因贈湛水詩云松風滿幽谷落日瞻遶山  
飛鳥去已盡幽人常自閒種芋岩石下採藥白雲間  
寂忘塵事蕭然獨閉關

## 雙泉寺在縣西南二十五里天台山

邑宰陳鍾琛天台山雙泉寺記云余生長山陬遊跡幾  
徧天下每於山水之際結癖良深一行作吏得永平之  
撫甯撫故多山嘗於簿書之暇縱轡尋幽有所得輒欣  
然忘返戊子春偕友人探勝於天台山憩雙泉寺其地

崇山奧衍競秀爭奇遶寺多種梨花時瓊英繽紛恍入神仙窟宅願僅神宇數楹遊人倚徙無所乃與住僧正化言而慨之僧前席曰是寺也舊在茲山之東嶺結茅而居名飲泉庵形勢逼仄殆不可狀雍正七年始移建於此而雙泉寺乃得名焉草創粗完規模狹隘乾隆二十七年僧焚修寺中藤金葺治以今視昔蓋已畧爲寬廣矣當時本欲備精舍繕繚垣旋以經費不敷而止至今僧蓋心焉念之弗敢忘因爲余言某處可以建房某處可以浴池指畫地形井井不紊余爲之輟然而喜屬之曰助哉有志者事竟成毋負此一腔善念也繼此二年來正化聖開地利加以抄募竟於辛卯之春鳩工庀材次第修治既蒔事來告余曰僧今有以報命矣山門改建三楹作敞軒式以資眺遠門東置羣房五間殿仍舊制而丹堊之前增東西耳房各一間後築圍牆數十丈築木周匝蓮池清深不敢云爲山靈別開生面庶幾一招提深境矣請公落其成而記之會余適以王事馳驅未卽踐約然而峯巒林麓之間神遊蓋久聞正化言境界已歷歷在心目間默念寺既改觀山益獻技從此可以快遊客之登臨俱騷人之嘯咏則天工將藉八力而益著正化之用心可謂勤矣爰書數語以付之

他日吏事少閒行將再命遊屐曠觀新構回憶前緣必  
且坐臥低徊流連不忍去則余山水之癖亦不至銷磨  
於塵氛俗障中也是爲記

盧龍辛大成遊雙泉寺詩云數年絕遊跡今復快登臨  
一水清塵抱層巒豁遠心路穿高鳥外杖入亂雲深恨  
少驚人句峯

頭恣嘯吟

邑宰陶淑初夏攝事驪城偕振遠上人及舍弟輩白水  
雲寺至天台山雙泉寺得七古一章云聯朝訟牒紛紛  
埽有如荒園除蔓草胸次欲使俗根除會訪名山事幽  
討平明騎馬出城西四面巒光接馬蹄山靈一似招我  
去崗巒變幻無端倪路轉蘆峯煙徑曲一山奇突飛濃  
綠人言此地天台山放眼貪看意未足山後黃崖峙碧  
峯上有古潭蛟龍空水雲漠漠不辨寺但聞萬壑鳴松  
風盤登幾層到山腹始見天台真面目雙泉湧地法界  
涼祇讓老僧納清福吾聞天台迷阮劉仙人洞府藏深  
幽茲山無乃是幻化飛來此地成丹邱山峯倒影山嵐  
收墨花狼藉航交酬惟有違  
公橫淡趣揮塵山門石點頭

陽灤寺在縣西南四十里馬家莊東溝

二聖廟在雙望東關

清灤寺在縣北十二里石河莊

吉慶菴在後白塔莊

極樂菴在黃家山西路北

雲峯寺在縣西北十七里曹西莊西

真觀在縣西北二十五里俗名螞蚱菴道士劉大成結

菴於此日率弟子種植果木積資創建玉皇殿紫霞洞

小蓬萊閣每逢春日花開遊人畢至尤擅一時之勝

邑宰趙端秋日同友人汪峻明及門王晚仙塔蘇岷源  
兒道教景祿景衡遊尋真觀遇雨詩云曉出城西路仙

江初青遊綠沙平野潤利亂山秋數騎穿盤磴雙旌  
隨茂流停驂選宿處霖雨淫征裘一片俱濛色千峯望  
不分瀑奔翻助雨嵐氣縹緲成雲過嶺人呼隊穿林馬失  
羣懸知仙蹤近山果落紛紛古觀清幽處偏宜靜者尋  
好將邱壑望遙浣市朝心捫石淩虛壁披雲見遠岑嘯  
臺憑眺久茗院足長吟吟眺忘歸晚隔林疏磬聲烟霞  
留永日竹樹寄餘情野渡流方急沙  
痕溼更輕嚴城燈火近戍鼓報初更

雲巖寺在縣西北四十里燕河莊白燕橋東

鐵佛寺在馬各莊西

雙龍禪院在縣東北四十五里南天門洞

山陰諸元壽建天門洞雙龍禪院記云背牛奇矣黃崖  
雄矣五峯秀矣天門兼雄奇秀奧而名獨晚出於諸山  
豈不以時哉茲山始則荒莽中一石厓耳高插雲嵐間  
斯時山顯而洞隱舊傳野人掘土山窟中歲久窟穿忽  
見石洞旁行往瞰有苾芻趺坐蓋化僧也而洞顯矣但  
當日山屬塞外熊鹿所居人跡罕至時雖有洞而少僧



自南塘戚公展邊僧性存來住錫於茲結庵施茶纔展其地耳時雖有僧而無院夫山靈之迥異天勝之也梵宇之弘隆人勝之也况人定勝天乎昔人移山而山懼非懼其人也懼其子若孫耳性存勤修數十年臨歿囑其徒海据以成其志時當鼎革兵燹未遑康熙初始募資構材拮据卒瘁乃於庵後鑿崖闢地建大殿三間肯堂矣未肯構也弟子寂祿復持疏下三韓趨齊魯擲風沐雨奔走有年於是補建韋馱殿一間兩廊六間大殿配房四間山門一間垣環砌堊中塑三慈氏像鑿理洞門懸鐘於簷於康熙十四年八月功始成采龕朱几楹柱雕題望之如在天半始與三山競勝矣登茲山也直上逼諸天捫星漢下視同蒼蒼耳入其洞窈然而深升其堂朗然而曠予因慨茲山之顯晦有時人力之通塞有待當其時之未至雖天造之奇不能自顯苟人力不急始卽見難積數世之經營而志無不遂者乃知時必有待而力不可不堅也甯獨開山也哉予深嘉祿祖孫之堅其力而山靈有待而顯也爲記之如此然祿所爲特福田耳若夫究無上之微言參一乘之妙法則洞中老僧或出而育以詔之矣

無庸縣志卷七

關堡

津梁附

王公設險不外山川衆志成城儼同帶礪此謂有形之保障猶或短垣自踰無衆之金湯反得長城自恃也然而玉門銅柱邊防固賴人謀楊葉榆林關塞仍資地利撫甯之爲縣也東西當遼薊之衝南北據海山之險口名界嶺地限華夷山號將臺人憑戰宇當年東道不通相望烽烟數千里縱有南塘坐鎮但能安堵四十年如此巖疆久稱重鎮矣迄今塞下間田耕夫叱犢沙邊舊壘牧豎驅牛人亦何幸生此太平

世界耶至若曰權曰杓水有難方成枉成梁民無病  
涉渭橋南渡象原法乎牽牛魏將西征師又防乎陷  
馬斯亦形勝所攸關同爲王政所不廢志邊隘及橋  
梁

猩猩峪城在縣東北四十五里石城高丈七尺周八十八  
丈二尺西門有樓木名宣府營明設指揮二名兼烽把  
總三名信官四名界嶺口管轄我

朝順治年間裁撤由猩猩峪至邊牆三十里邊牆外有石  
城三座基址尙存外邊牆一道里許牆上戍樓與敵樓  
由背牛山下至孤石峪入臨榆界共二十五座

案古今圖書集

咸引府志云星星峒堡移堡  
退四十里於潘家莊仍舊名

甘泉堡在縣東北五十里西接星星峒又東有溫泉堡

界嶺口城在縣東北七十里口有山曰東頂西頂兩頂相  
對高聳入雲舊城在兩頂之下中隔一水分爲東西月  
城東月城自東頂蜿蜒而來東面狹不足丈數西面百  
二十步有門有衙署有民居南面三百二十七步北面  
三百九十一歩卽邊城統計周二里零一百十步西月  
城由西頂蟠繞而下多樹木無民居西面狹不足丈數  
東面七十八步有小水門南面二百十步北面百八十  
四步卽邊城統計周一里零百十二步自康熙元年設

把總一員馬兵一名字識一名字兵十四名兼管青山

口河口重峪口冷峯口汎地東至箭杆嶺二十五里磚

城高三丈五尺周三百七十五丈四尺西門有樓舊云

三十三關此爲最要

案讀史方輿紀要云嘉靖三十七年土蠻犯界嶺口官軍拒卻之今

有關城爲戍守要地邊畧界嶺口東十五里曰十八盤嶺又東三十五里曰牛心山去義院口三十里又口北十八里爲梨花山又北六十里爲茨兒山又北三十里曰紅石嶺皆朔騎出沒處也○按境內陽河發源於西北十里之羅漢洞南流十里入關讀史方輿紀要云羅漢洞關西接青山口東連界嶺口有小城爲戍守要地隆慶初蒙古土蠻入沙嶺羅漢洞大掠郡境卽此沙嶺在遷安縣冷口關外按此則洞舊有城今已廢不可考矣

明劉景耀界嶺詩云界嶺連雲際陽河入海流山川胡地近風雨漢宮秋處處嚴烽火朝朝逐馬牛誰憐漢

將白首  
不封侯

聖德

乾隆十四年界嶺口核減碑記云界嶺口原額正加米七十一石五斗九升四合九勺九抄一撮豆八十二石零六升四勺三抄四撮七圭五粟在昔坐斗征收民苦上納久矣乾隆六年有婁思福者會眾具呈蒙憲轅詳申奏將原額減去十之七下剩十之三今存正米二十五石五斗五升九勺八抄零豆二十八石六斗二升一合一勺二抄零連馴馬寨糧數在內民等雀躍歡欣頌頌無由有常君得榮泊子常貞恐積久弊生與眾共議故勒石以記其事俾後世納糧之家知

聖德

無疆抑以知核減始末之由也云爾

咸豐九年界嶺口減差碑記云蓋聞官以恤民民以奉公官民一體由來舊矣吾堡小人向蒙

皇上

牧養之恩敢不奉公守法而圖免國家之差務乎緣我

界嶺口一堡民居邊關山稠地窄奉上之物無出河漲水發貽害之道有由東餒不免所必然也於咸豐八年縣尊梅公莅任鄉地劉承發差務循舊遵辦甚難民人鮑希昇太息堡之困苦尤切具稟請輕懇恩上叩一一訴其緣由而梅公若念子民之困乏心甚惻然布化宣

猷大朕召伯之德惠鮮懷保欲存鄭僑之風憐我一堡  
愷切勸諭謂國家經費有常民力在所必借爲之斟酌  
率以差務折辦束錢三百吊爲度梅公之德沒世難忘  
於是集會一堡二十三莊公同商議均撥均劈勒碑刻  
銘永垂不朽

明劉景耀界嶺正關樓得才字詩云城頭碣石鬱崔嵬  
倚檻春風塞外來三輔河山時對酒九邊烽火共登臺  
秦皇島上仙雲散姜女祠前古月回  
莫道書生無俠骨毛錐元負佩刀才

衙杆嶺城在縣東北七十里口設木柵兩重河水穿柵入  
東南至花果山十里東北至碼礫嶺十里臨榆界城高  
三丈六尺東面八十四步卽邊城西面二十步有門一  
南面二百步北面百八十一步統計周一里零百二十  
五步西南二里舊有墩臺一今廢東南半里有墩臺一

高三丈六尺周十二丈城有守兵一名屬臺頭營管又

城東南有小月城周八十六步西北有小水門今廢

案讀

史方輿紀要云箭杆嶺關在縣北界嶺口東第一關口也又東接雙岔谷星星谷等關又葦子谷關界嶺口東

第四關口也又東恩細谷口花場谷拿子谷

等關而接義院口皆有小城爲戍守要地

乾隆六年五關一營十八莊花戶同立三官廟改征邊

屯米豆數目牌示碑記云官保兵部尙書兼都察院右

都御史總督直隸等處地方紫荆密雲等關隘提督軍

務兼理糧餉加七級孫爲奏問事乾隆五年十二月二

十六日戶部咨前事等因到本部堂准此擬合就行爲

此牌印該司官吏查照各牌內部覆奉

理卽欽遵移永平府轉飭該地方官將箭杆嶺等處河

淤地邊儲屯地應改征銀米豆石名數目於辛酉年爲

始減額征收並飭該府出示曉諭俾里民均霑實惠取

具遵依送查仍將錢永二堡屯地每畝減征米五合之

處卽覆無庸議緣由並行知照外合行出示曉諭爲此

示仰屯民知悉各口邊儲屯地自乾隆六年爲始凡係



河淤屯地每畝改征銀一分米二升二勺五抄七撮一圭六粟一顆豆三升邊儲屯地每畝改征米一升五合一勺二抄八撮五圭八粟五粒豆一升五合荒無新舊每畝納征銀一分兩等俱各查明應輸科則及時完納如有不肖官長兵役及各糧頭私行多征者許爾花戶赴本縣院衙門稟報以憑分別參究決不姑貸慎之毋違須至告示者

梁家灣城在縣東北六十里卽中桑谷堡石城高丈八尺周百三十二丈七尺南門有樓案古今圖書集成中桑谷堡下云舊桑岔谷中菴二堡後置梁家灣合爲堡有城

駙馬寨營在縣北五十里石城高二丈周百八十五丈門三東西門俱廢南門存無樓城中無井井在東門外二

百步

桑岔谷關在縣北四十五里石城今廢

青山口城在縣北五十里北距邊城二里城高丈六尺東面八十三步西面九十四步南面百零一步俱有門北面八十六步有閣無門統計周圍一里零四步口設木柵外有重垣橫亘水穿柵入逕城西直下西築敵臺二東二臺最高者曰萬丈高樓東至界嶺口二十五里與縣官營聲援

國初設把總今裁現有守兵一名屬界嶺口管

案讀史方輿紀要引

邊畧云青山口北二十里曰三嶺溝又北八里曰初子谷皆戍守處也○羅漢洞關西接青山口東連界嶺關

有小城爲戍守要地隆慶初蒙古土蠻入沙嶺羅漢洞大掠郡境卽此沙嶺在遷安縣冷口關外

青山駐操營在縣東北百十里石城高二丈周三百四十

七丈東西南三門

乾隆七年邊儲屯減賦碑云邊庭地瘠未編入甲社其糧黑白二色歸本府懷廳轉運山海關養兵乾隆初年拖欠甚多民不聊生值部使厲自朝鮮歸貧民呈請乃爲上奏

欽命本省總督孫沿邊巡察周知民瘼據情申奏遂照舊額去七留三後以界青二口地近山海其煩派邊民催收送司廳直達山海關亦省約之計也青山口地處山陬無寬平膏腴之田糧屬邊儲一年有九十九石八斗二升三合之供歲逢大有猶且難以輪納一遇凶年卽不免於稱貸邊民之苦由來舊矣奈

君門遠於萬里艱難何能以自陳

宸聽隔於九重疾苦無由以徧悉斯亦吾儕所無可如何者

者也幸遇厲大人軫念民依具疏特達於

辭座又蒙孫大人體恤民隱呈表復奏於

明廷

皇上德配二帝從諫如流心同三王有言必聽

明室議減遂易九十九石八斗二升三合之租

玉冊遙頒僅存三十石二斗七升之數蓋以主聖而明是以

臣賢而良於時稅歛既薄乃以俯仰有資予小民獨非人情乎哉而不思表

君恩於萬一也耶於是羣萃共議建造此碑以示

永垂不朽云乾隆七年壬戌律中中呂之吉

案撫邑北境以界嶺口青山口為險隘界嶺方軌可進

青山一徑如線止通步馬然前明崇禎戊寅我

大清兵下畿輔四十餘城由青山口入已躬自青山口出

庚午取遵化永平及昌黎撫甯數處所出則越青山而

河口崇峪口桃林口劉家口極西之冷口也惟隆慶初

土蠻入寇薊鎮撫甯昌黎皆被蹂躪積患三十餘年如

則由界嶺入正統時擊兀良哈命石亨出界嶺口一片

石九江口前亦撫甯地也今名九門屬臨榆出入便於

山海關

國初時知縣劉馨曾修之

臺頭營城在縣北三十里磚城周四里南二門東西北各

撫甯縣志

卷七 關堡

六

一門北至界嶺口四十里東至李家莊二十七里西至  
盧龍燕河營三十里演武廳在南關久廢基長二十五  
丈濶十五丈二上馬石尙存

明崇禎六年永平兵備劉景耀臺頭營新鄉天馬雄飛  
樓記云薊鎮東四協而臺頭介其中東控遼海西引灤  
江南憑碣石北倚長城邊塞重地也已巳冬北敵深入  
郡邑不守而臺頭以彈丸之地保燕河扼撫甯爲關門  
觴角撐持東北半壁豈不以區區之城可恃無恐也哉  
城三面俱有樓而南門獨缺於所謂臺頭者義殊不協  
張君時傑以武進士總此地兵毅然捐資爲諸將士倡  
不日而成此樓中丞文弱楊公題其額曰天馬雄飛取  
映馬頭岩而名也癸酉秋景耀備兵北平獲登斯樓望  
茶芽之晚翠披蘆壑之驚風洋河橫郭而潺湲界嶺插  
天而隆嵒居然塞上大觀也樓凡三間足避風雨霜雪  
并貯弓矢器具蓋不徒侈壯觀也老嫗六月而製寒衣  
隣婦過而笑之迨金風轉氣乍肅手則縮口則呵始知  
製衣者之深謀遠慮而臨期補縫晚矣大將之治邊惟

老嫗之治家也若謂如庾亮南樓興復不戢則未曾建樓之意也夫

又臺頭營三角樓記云總鎮張公守臺頭時於城南門建樓復起奎樓於東南以應之信形勝哉尋權京營以去協守王公繼之於三角各起一樓巍然鼎峙蓋欲壯百二之關河而德萬之生命功亦鉅矣張公秉鉞關門過臺頭視三樓而欣然曰此予所有志未逮者何匪歲而竟成也王公謝曰應暉因公之功而竟此緒餘也夫何功先是登樓者曰天馬雄飛大觀在是今登三樓者曰海鰲湧現衆美悉備二公之有造於臺頭者用心密而垂慮周宜遺愛俱永也繇是金湯永固以戰以守屹然北門坐鎮矣乃敬爲之銘曰臺頭山蒼蒼翠屏臺頭水悠悠寒汀於焉時樓矗省干星壯哉蒲羅以治以甯地入天長水綠山青臨榆蘭士元臺頭營紫極宮晚眺詩云荒城四面低讓出清虛府築臺有百梯拓地只數武捷足試先登翩然變化雨水淺沙磧平山缺松林補眼底萬千家比鄰紛可數晚爨起炊烟白雲互吞吐鈴聲語佛樓神風動廓廡翻思上一層餘勇猶能賈金鎖難開松扉隔琳宇老僧期不來日落伴河浦

又晚過撫甯北口望臺頭營詩云萬松高鎖白雲窠行盡烟蘿異境多山合四圍包古堞巖分兩界納洋河斷霞落日春鴻杳淡月寒沙匹馬過舊是南塘飛檝處只今惟有野樵歌

東勝寨城在縣西北五十里石城高丈五尺周百二十八丈八尺門在南

乾澗堡在縣西北六十里石城高丈四尺周百九十二丈南西二門

麻官營堡在縣西北六十里石城周三里許在河口東南與東勝寨接河口水由寨東南流至沈莊東北石槽峪水來會之南下逕黃土坎南注西洋河其間香爐山最著

以河堡在縣東四十里城高共梁口三丈二尺周三百餘丈門四東西門尙存門樓俱廢今設巡檢分司

馬頭嶽堡在縣北二十里

羊角山堡在縣北三十里

案讀史方輿紀要作牛角山寨

鵝鴿堂堡在縣西四十里

鵬崖堡在縣西北三十里

塔子山堡在縣東三十里

兔嘴岩堡在縣南三十里

案讀史方輿紀要以上六堡皆民堡也

附

陽河橋凡七處一在縣西一里一在縣南三里一在縣東



南八里一在縣東南二十五里一在縣北二十五里一在縣西北三十里一在縣西北四十里水寒則設水泛則拆

鍾家橋在縣東三里

渝河橋在縣東二十里

蒲藍橋在縣東南二十里

李官營橋在縣北三里石橋

程家莊橋在縣北七里

霞霞橋在舊縣北二里

李家橋在洋河渡口興隆莊人李福安因祝母壽建此又

因山水漲落不常復捐地六畝以其租息爲每年搭卸之費近村名之曰李家橋立碣河濱邑貢生樊繼撰文以紀其事

洋河渡在縣城西乾隆十三年合邑紳士修築河堤一道知縣陳鍾琛捐造渡船并捐俸生息爲船夫費

驛站 墩撥公館附

皇華載路征夫駢駢擁簪迎門有客宿宿捷飛郵於星火彈丸之夫役幾何綿長路於關山驛遞之丞員尤億

國家兩都並建九域來同奉天三省之

欽差朝鮮八道之貢使驪歌遞唱共驚榆塞風寒

鳳詔頻銜儘道蘆峯路熟蓋

京畿傳舍當天下十分之三而撫邑郵亭倍永平六屬  
之一也顧從前驛未歸縣職不相兼今也合牧民於  
牧馬須知害馬當除昔者聞驅衆如驅鷄漫道割鷄  
焉用錢糧額設發於縣者常見其多應付往來用於  
驛者恆虞其少於是有協濟之馬有添雇之夫經制  
內無所領支矣有派撥之夫有買補之馬雜泛外疑  
於重歛矣惟念傳遞之艱仍戒閭閻之擾守成規於  
勿替條今日之宜施庶使平平蕩蕩遵道者共康由

庚總總林林應役者無憂旁午也已志驛站及墩撥

### 公館

驛驛在縣西十五里明洪武十四年置此驛原係府屬  
萬曆二年知縣姜密申爲縣屬後移縣治東南遞運所  
故址順治十三年裁驛丞歸縣額設馬五十匹預轎夫  
四十名廚役五名抄牌馬夫二十七名接遞皂隸八名  
驛皂二名

舊志

驛當極衝今存馬八十六匹夫四十三名預轎夫四十  
名獸醫一名抄牌字識一名鋤草喂馬夫三名接遞皂  
隸四名共銀五千四百一十二兩六錢遇閏按月加增

驛丞掌之後併遞運所於驛

通志

初額設工料銀并遞馬等銀四千七百五兩閏月銀二百九十一兩六錢六分六釐七毫除歷年奉裁外實支工料銀三千一百九十三兩二分閏月銀二百三十六兩九錢三分二釐五毫二絲九忽九微四纖乾隆二十五年奉文爲酌籌調撥驛馬以益郵政事案內奉裁馬十四匹夫七名裁工料銀五百七十八兩六錢二分四釐是剩裁存工料銀四千二百九十二兩七錢一分六釐額設馬七十二匹一歲應支銀一千九百四十四兩小建六日除銀三十二兩四錢不支馬夫獸醫馬牌子

鋤草喂馬夫共四十名又續增馬牌子二名抄牌字識  
一名接遞皂隸四名一歲共應支銀八百八十七兩二  
錢二分小建六日除銀一十四兩七錢八分七釐不支  
損轎夫四十名一歲應支銀六百四十八兩小建六日  
除銀十兩零八錢不支又除留二夫八名扣工食銀一  
百二十七兩四錢四分不支實支銀五百零九兩七錢  
六分

案蘆峯驛名最古今則名是而實非舊志謂驛原屬府  
設於蘆峯口西至府城五十五里東至深河五十五里  
馬力適中此名實信符者也明神宗時知縣姜密申於

府歸縣乃遷驛於南門內迤東

舊志謂在南門外誤

今僅存馬神

小廟猶稱驛胡同云然蘆峯之名相沿不改及裁驛丞

等官

順治十三年

又移於縣署西側往時驛路由西門外繞

城入南門換遞夫馬今驛路由北門入卽一驛而三變

他可以觀矣

榆關驛在縣東四十里深河堡明洪武十四年置

國朝初廢後復置極衝現存馬八十六匹夫四十三名頂

轎夫三十名獸醫一名抄牌字識一名馬牌子三名鋤

草喂馬夫三名接遞皂隸四名共銀一百八十兩四錢

遇閏按月加增驛丞掌之遞運所明成化三年都御史

閻公題設同知劉遂督建神宗二年裁故址今名驛胡同

初設工料銀六千二百七十四兩七錢五分八釐奉復後遞經裁存工料銀四千六百六十二兩三錢六分於乾隆十五年奉文爲酌籌調撥驛馬以益郵政事案內奉裁續增馬十四匹夫七名裁工料銀五百七十一兩二錢九分八釐實剩裁存工料銀四千零九十一兩零六分二釐額設馬七十二匹一歲應支銀一千九百四十四兩小建六日除銀三十二兩四錢不支馬夫獸醫馬牌子鋤草喂馬夫共四十一名又續增馬牌子二名



抄牌字識一名接遞皂隸四名一歲應支銀八百八十三兩四錢四分小建六日除銀一十四兩七錢二分四釐不支損轎夫三十名一歲應支銀四百八十六兩小建六日除銀八兩一錢又除留二夫六名扣工食銀九十五兩五錢八分不支實支銀三百八十二兩三錢二

分明董越撫甯道中榆關驛有感詩云曉別撫甯郭天低海氣連蒼茫初出日慘淡未收烟茅屋多依樹村

張半在田榆關前驛近代鼓正淵淵

縣總舖在縣治東二十步橫山舖在城東五里白石舖撥汎在城東十五里有墩臺馬頭舖在城東二十五里馬棚山有墩臺深河舖在城東四十里高臺嶺撥汎有墩

臺綠灣舖在城西五里十里臺撥汎有墩臺盧峯舖撥  
汎在城西十五里有墩臺背陰舖在城西二十七里飲  
馬河撥汎有墩臺雙望舖在城西三十五里盧龍界額  
設舖司兵三十名每名歲支工食銀六兩共銀一百八  
十兩康熙十七年裁銀九十兩二十年奉復仍實支銀  
一百八十兩乾隆三年裁銀六十兩實支銀一百二十  
兩咸豐八年裁銀九十六兩實支銀二十四兩遇閏加  
銀一十五兩康熙十一年裁二十兩奉復仍實支銀一  
十五兩乾隆三年裁銀五兩實支銀十兩咸豐八年裁  
銀八兩實支銀二兩

公館原在永平府東關路北歲久頽廢地基闊十二大步  
長三十七大步見地一畝八分五釐康熙二年四月閩  
社置買王開乾瓦房一所價銀二百兩有奇坐落府衙  
西柴市口路北十六年復買王開乾趙錦地基二塊價  
銀十八兩紅契俱付庫收存內計頭層門房三間二層  
廳房三間二層後書房二間西邊廚房三間東邊馬房  
三間三層房四間四層房四間